



Bjørk Lange Olsen

Inatsisartunut ilaasortaq, Demokraatit

§ 37 naapertorlugu apeqqutip nr. 158/2023-p akineqarnera

01-12-2023

Suliap nr. 2023-27435

All. nr. 23102322

Asasara Bjørk Lange Olsen

Inatsisartut suleriaasianni § 37, imm. 1 naapertorlugu Naalakkersuisunut apeqqutinik saqqummiussaqarputit Naalakkersuisunut Apeqqutit uannut akisassangorluginnertut innersuunneqartut qujassutigaakka. Apeqqutit issuarneqarput ataanilu akineqarlutik.

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@nanoq.gl
www.naalakkersuisut.gl

1. Naalakkersuisut qanoq isumaqarpat, innuttaasut amerligaluttuinnartut privaatimik aningaaasanik katersuiniartalernerannut eqqortumik peqqissutsimut passunneqarnissartik anguniarlugu?

Akissut:

Innuttaasut namminneerlutik aningaaasanik katersuiniarnernik aallartittarnerannut tunngatillugu imaluunniit nunatsinni Peqqinnissaqarfik avaqqullugu katsorsartinnissamut periarfissanik allanik ujartuisarnerannut tunngatillugu amerliartornerannut Naalakkersuisut kisitsaateqanngillat.

Peqqinnissaqarfik avaqqullugu peqqinnissamut tunngatillugu eqqortumik neqeroorfingeqarnissaq anguniarlugu innuttaasut nalinginnaasumik misisortinnissamut imaluunniit katsorsartinnissamut periarfissanik allanik ujartuisariaqanngitsut Naalakkersuisut isumaqarput. Nuna tamakkerlugu peqqinnissaqarfimmut peqqinnissaqarfimmilu sulisunut tamanut innuttaasut pisariaqartitaannut tunngatillugu ullaat tamaasa annertoorujussuarmik sullisisartunut Naalakkersuisut soorunami tatiginnitorujussuupput.

Tamatuma peqatigisaanik peqqinnissaqarfip assigiinngitsutigut unammilligassaqarnera, pingartumik sulisussarsiortarnermut peqqinnissakkullu sullisisut sulisoriinnarnissaannut tunngatillugu unammilligassaqarnera Naalakkersuisut miserratigingilaat. Taamaammat peqqinnissaqarfimmik nukittorsaaniarluni politikkikkut tunngaviusumik isumaqatigiisummik imaqartumik peqqissutsimut tunngatillugu qanittukkut isumaqatigiisuteqartoqarnera iluarisimaarpalput. Ukiuni tulliuttuni suliaq tamanna ingerlanneqassaaq.

a. Amerligaluttuinnarnerannut peqqutaasinnaasunut Naalakkersuisut tunngavissiisinhaappat?

Akissut:

Apeqqut 1-imut akissut takuuk.

- 2. Naalakkersuisut qanoq isumaqarpat, qanigisaasut meeqqanut,
Peqqinnissaqarfíup kukkanlutorneratigut toqusimasunut,
naapertuilluarnerunissamik neriuuteqarlutik, inatsisilerituunik akisoqisunik
pissarsisariaqarsimanerantut suliakkiissutiminnik suliaqartussanik?**

Akissut:

Inatsisini aaqqissuussat aalajangersarneqarsimasut eqqarsaatigalugit peqqinnissamut tunngatillugu nakkutiliinermut, naammagittaalliornermut taarsiinissamullu tunngatillugu sulianik isumaginnittunut Naalakkersuisut tatiginnippu. Peqqinnissaqarfímmi katsorsarneqarnermut atatillugu kukkusqarsimasoq isumaqaraanni innuttaasut tamarmik naammagittaalliorfármik pilersinneqarsimasumik atuisassasut kajumissaarusuppavut.

§ 37 naapertorlugu apeqqutip nr. 140/2023-p akineqarnerani apeqqutip 3-mut akissut innersuussutigineqarputtaaq.

- 3. Naalakkersuisut isumaqarpat, maannakkut napparsimasut
naammagittaalliorfiat naammaginartumik ingerlasoq?**

Akissut:

Peqqinnissaqarfímmi nakorsat, peqqissaasut allallu kukkunerisa kingunerisaanik ilungersunartumik pisoqartillugu maannakkut nakkutilliivimmut napparsimasullu naammagittaalliorfiannut saqqummiunneqartarnissaannut tunngatillugu Naalakkersuisut tatiginnippu. Tamatuma peqatigisaanik nakkutilliiviup aamma napparsimasut naammagittaalliorfiata inatsisitigut tunngaviusut Inatsisartunit akuerineqarsimasut malillugit naammaginarluinnartumik ingerlaneranut Naalakkersuisut tatiginnippu.

Naammagittaalliorneq pillugu inatsit nutaaq aamma taarsiissuteqartarneq pillugu inatsit nutaaq pillugit apeqqummut 4-mut akissut takuuk.

- a. Agguaqatigiissillugu napparsimasup naammagittaalliuutaa qanoq
sivisutigisumik suliarineqartarpa?**

Akissut:

Napparsimasoq katsorsaaneq pillugu naammagittaalliuuteqaruni Nunatsinni Nakorsaneqarfíup naammagittaalliuut tigussavaa, taannalu paassisutissanik attuumassutilinnik kiisalu peqqinnissakkut sullisisut akuusimasut oqaaseqaataannik pissarsiniassaq.

Paassisutissat tamarmik katarsorneqareerpata suliaq naammagittaalliuummut tunngasoq Danmarkimi Napparsimasut Maalaarutaannut Aqutsisoqarfímmut ingerlateqqinnejqassaaq, tassanilu Napparsimasut Maalaarutaannik Aalangiisartut suliaq suliarissavaat¹ aalajangiiffagalugulu. Nunatsinni Nakorsaneqarfímmut aamma Napparsimasut Maalaarutaannik Aalangiisartunut napparsimasut naammagittaalliuutaannut tunngatillugu sulianik

¹ Napparsimasut Maalaarutaannik Aalangiisartut tassaapput oqartussaasut arlaannaanulluunniit attuumassuteqanngitsut, taakkulu peqqinnissaqarfíup ingerlanneqarneranut akisussaaffeqarlutik oqartussaasunut attuumassuteqanngillat. Naammagittaalliuuteqartarfík aalajangiigaangat, inuinnaat marluk peqqinnissaqarfímmik atuisunut sinniisuusut, peqqissaanermillu ilinniarsimasut sulisut marluk peqataasarp. Ataatsimiititaliaq eqqartuussisumik siulittaasoqarpoq.

suliarinninnerinnittarnerisa agguaqatigiissillugu sivisussusaat akissummi matumani immikkut naatsorsorneqarput, tassami taakku oqartussaasut sulianik suliarinnittarmata².

Piffissami 2021-miit 2023-mut napparsimasut naammagittaalliuutaasa Nunatsinni Nakorsaneqarfimmi suliat suliarineqarsimasut sivisussusiisa agguaqatigiissinnerat qaammatinut agguarneqarsimasut tabeli 1-imi takuneqarsinnaapput.

Ukioq	Qaammatit amerlassusaat
2021-2023	4,7

Suliani naammagittaalliuutinut tunngasuni ataasiakkaani sulianik suliarinninnerit sivisussusaat eqqarsaatigalugit annertuumik assigiinngissuteqarnera paassisutissiutigineqarsinnaavoq, tassanilu suliat annertussusaat pisariunerallu pissutaapput. Taamaattorli Nunatsinni Nakorsaneqarfimmi suliat affaasa missaat qaammatini pingasuni sivikinnerusumilluunniit suliarineqartarput.

Piffissami 2020-miit 2023-mut Napparsimasut Maalaarutaannik Aalajangiisartuni,³ Danmarkimi Napparsimasut isumannaatsuuunissaat pillugu Aqutsisoqarfimmiittumi, suliat suliarineqarsimasut sivisussusiisa agguaqatigiissinnerat qaammatinut agguarneqarsimasut tabeli 2-mi takuneqarsinnaapput. Tabel 2 takuu.

Ukioq	Qaammatit amerlassusaat
2020	18,7
2021	16,7
2022	15,6
2023 ⁴	10,7

Napparsimasut Maalaarutaannik Aalajangiisartut agguaqatigiissillugu qaammatini qulingiluani suliarinnittarnissamik anguniagaqarput⁵.

i. **Naalakkersuisut akissuteqarnissamut piffissarititaasoq iluarisimaarpaat?**

Akissut:

Peqqissaartumik sulianik suliarinninneq sivisusarpoq aamma suliat ingerlanneqarnerat imaannaangitsuukkajupput, tassanilu peqqinnissakkut sullisisut arlallit akuusarput.

² Nunatsinni Nakorsaneqarfimmi aamma Napparsimasut isumannaatsuuunissaat pillugu Aqutsisoqarfimmi kukkusumik nalunaarsuisimanerit naatsorsuinerni nangaassutigineqarput. Nunatsinni Nakorsaneqarfimmi paassisutissat ataatsimoortut arlalinnik killilersuiteqarput, sulianik suliarinnittarnerup agguaqatigiissillugu sivisussusaanik naatsorsuinermut sunniiteqarsinnaasunik.

³ Napparsimasut Maalaarutaannik Aalajangiisartut tassaapput oqartussaasut arlaannaanulluunniit attuumassuteqanngitsut, taakkulu peqqinnissaqarfiup ingerlanneqarneranut akisussaaffeqarlutik oqartussaasunut attuumassuteqanngillat. Naammagittaalliuuteqartarfik aalajangiigaangat, inuinaat marluk peqqinnissaqarfimmik atuisunut sinniisuusut, peqqissaanermillu ilinniarsimasut sulisut marluk peqataasarput. Ataatsimiititaliaq eqqartuussisumik siulittaasoqarpoq.

⁴2023-mut naatsorsuineq ulloq 17. november 2023 suliarineqarpoq.

⁵ <https://stpk.dk/om-os/stpk-i-tal/>

Agguaqatigiissillugu suliap sivisuumik suliarineqartarnerata pineqartunut tamanut ilungersunartuuusinnaanera Naalakkersuisunit paasisinnaavarput. Aamma Napparsimasut Maalaarutaannik Aalajangiisartuni agguaqatigiissillugu qaammatini qulingiluani suliat suliarineqartarnissaannik anguniagaqarneq eqqarsaatigalugu qaammatit qulingiluat sinnerujussuarlugit agguaqatigiissillugu sulianik suliarinnitarnerat soorunami naammaginanngilaq. Taamaammat agguaqatigiissillugu sulianik suliarinnitarnerup sivisussusaata sivikilliartornera Naalakkersuisut pitsasutut isigaa.

b. Qanoq akuliksigsunik, napparsimasoq naammagittaalliuumminik taperserneqartarpa?

Akissut:

Piffissami 2020-miit 2023-miit novemberip tungaanut suliat naammagittaalliuutinut tunngasut aalajangiivigineqarnerannik agguataarneqarnerat tabeli 3-miit takuneqarsinnaapput. Piffissami 2020-miit 2023-p tungaanut Napparsimasut Maalaarutaannik Aalajangiisartut agguaqatigiissillugu sulianik 89-inik suliaqartarput.

<i>Ukioq</i>	<i>Itigartinne qartut</i>	<i>Aalajangiisoqa rtinnagu suliat matuneqarsim apput</i>	<i>Isornartoqartinne qanngitsut</i>	<i>Isornartoqartin neqartut</i>	<i>Isornartoqart itsinerit peqqussuteq arfusut</i>
2020	7,6%	4,5 %	68,2 %	19,7%	0 %
2021	6,8 %	3,4 %	62,5 %	26,1%	1,1%
2022	20,7 %	4,3 %	57,6 %	17,4%	0 %
2023 ⁶	18,8%	2,1 %	59,4 %	16,7 %	3,1 %

c. Naalakkersuisut iluarismaarpaat inuit naammagittaalliorusuttut siunnersorneqarsinnaanerat, aqqutissiuunneqarsinnaanerat tapersorsorneqarsinnaanerallu?

Akissut:

Atatsimut isigalugu naammagittaalliorissamut taarsiivigineqarnissamullu tunngatillugu ilisimasassarsiornissamut ilisimasassarsiornissamut periarfissaqarluartoq imaluunniit siunnersorneqarnissaq pillugu periarfissaqarluartoq Naalakkersuisut isumaqarput. Taamaattorli tamatuma peqatigisaanik naammagittaalliorarfuiup taarsiiviginntarfiullu atatsimoortinneqarsinnaanerat Naalakkersuisut miserratigisinnanngilaat, tassami suliat maani nunatsinni Danmarkimilu oqartussaqarfinnit assigiinngitsunit suliarineqartarmata. Taamaammat Sullissivik.gl-imik naammagittaalliorarfik pillugu paassisutissat ilitsersuullu pissarsiarineqarsinnaapput, tassani innuttaasoq aamma naammagittaalliuummik tunniussisinnaavoq. Innuttaasup napparsimasutut naammagittaalliuummik tunniussaqarnermini ikiorneqarnissamik siunnersorneqarnissamilluunniit pisariaqartitsiguni pineqartoq Peqqinnissaqarfimmik napparsimasunik siunnersortimut, Nunatsinni Nakorsaaneqarfimmut attaveqarsinnaavoq imaluunniit teknikkimut tunngappat najukkami kommunimi Inunniq Sullissivimmut attaveqarsinnaavoq.

⁶2023-mut naatsorsuineq ulloq 11. oktober 2023 suliarineqarpoq.

**4. Naalakkersuisut suliniutinik aallartitsinissamik pilersaaruteqarpat,
Peqqinnissaqarfimmi napparsimasut naammagittaalliortarnerinut
pitsannguutaasinnaasunik?**

Akissut:

Peqqissutsimut Naalakkersuisoqarfiup naammagittaalliortarnermut taarsiiviginntarnermullu tunngatillugu inatsimmik nutaamik sulissuteqarnera paasissutissiisutigineqarsinnaavoq. Nalinginnaasumik naammagittaalliortarfimmik pitsanngorsaanissaq inatsimmik nutarterinermi siunertaavoq. Naammagittaalliortarneq pillugu inatsit nutaaq aamma taarsiissuteqartarneq pillugu inatsit nutaaq aqqutigalugit katsorsartinnerup ingerlarnganut tamarmiusumut innuttaasut naammagittaalliornissamut periarfissarissaarnerulissapput, tassami massakkut aaqqissuussineq malillugu peqqinnissakkut sullisisut ataasiakkaat qitiutinnejartarpuit. Inatsimmi allannguutissatut pilersaarutaasut naammassineqarpata innuttaasut taarsiiffigineqarnissamut periarfissaat pitsanngoriarujussuassapput. Naammagittaalliortarneq pillugu inatsimmik aamma taarsiissuteqartarneq pillugu inatsit suliarineqaleruttorput taakkulu 2024-mi Inatsisartunut saqqummiunneqarnissaat anguniarneqarpoq.

**5. Pineqartumut Naalakkersuisut allanik suliamut soqutiginartunik
paasissutissiisinnaanerlutik?**

Akissut:

Naalakkersuisut allanik paasissutissaateqanngillat.

Inussiarnersumik inuullaqqusillunga

Med venlig hilsen

Agathe Fontain